



საგანმანათლებლო პროგრამების აკრედიტაციის
საბჭოს გადაწყვეტილება
ქ. თბილისი



MES 6 20 0001138277



30/11/2020

შპს უმაღლესი სასწავლებელი მილენიუმის „ბიზნესის ადმინისტრირების“ რუსულენოვანი
საბაკალავრო საგანმანათლებლო პროგრამის პირობითი აკრედიტაციის შესახებ

1. გადაწყვეტილების მიღების სამართლებრივი საფუძვლები

1.1. „უმაღლესი განათლების შესახებ“ საქართველოს კანონის 66-ე მუხლის პირველი პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტისა და საქართველოს განათლებისა და მეცნიერების მინისტრის 2011 წლის 4 მაისის №65/ნ ბრძანებით დამტკიცებული „საგანმანათლებლო დაწესებულებების საგანმანათლებლო პროგრამების აკრედიტაციის დებულების“ (შემდგომში - აკრედიტაციის დებულების) 27² მუხლის პირველი პუნქტის მიხედვით, საგანმანათლებლო პროგრამების აკრედიტაციის საბჭო (შემდგომში - საბჭო) სააკრედიტაციო დოკუმენტაციის, აკრედიტაციის ექსპერტთა ჯგუფის დასკვნის, დაწესებულების მიერ აკრედიტაციის ექსპერტთა ჯგუფის დასკვნის პროექტზე წარმოდგენილი არგუმენტირებული პოზიციის შესწავლისა და ზეპირი მოსმენის გამართვის საფუძველზე იღებს გადაწყვეტილებას საგანმანათლებლო დაწესებულების საგანმანათლებლო პროგრამების აკრედიტაციის თაობაზე. აკრედიტაციის დებულების 27⁵ მუხლის მე-5 პუნქტის თანახმად, საბჭო ვალდებულია დაასაბუთოს მის მიერ მიღებული გადაწყვეტილება.

1.2. „განათლების ხარისხის განვითარების შესახებ“ საქართველოს კანონის 22-ე მუხლის მე-2 პუნქტის „ბ“ ქვეპუნქტისა და აკრედიტაციის დებულების 27⁵ მუხლის პირველი პუნქტის „ბ“ ქვეპუნქტის შესაბამისად, საგანმანათლებლო პროგრამის პირობითი აკრედიტაციის შესახებ გადაწყვეტილებას იღებს საბჭო, თუ „განათლების ხარისხის განვითარების შესახებ“ საქართველოს კანონის 22-ე მუხლის 3² პუნქტისა და აკრედიტაციის დებულების 27⁶-ე მუხლის პირველი პუნქტის „გ“ ქვეპუნქტის თანახმად, საგანმანათლებლო პროგრამა სრულად ვერ აკმაყოფილებს აკრედიტაციის სტანდარტებს, კერძოდ, თუ საბჭოს მიერ საგანმანათლებლო პროგრამა აკრედიტაციის სტანდარტებთან შესაბამისობის შეფასებისას: ერთ სტანდარტთან

მიმართებით მაინც შეფასდა, როგორც „ნაწილობრივ შესაბამისობაშია სტანდარტის მოთხოვნებთან“ და არცერთ სტანდარტთან მიმართებით არ შეფასდება, როგორც „არ არის შესაბამისობაში სტანდარტის მოთხოვნებთან“.

1.3. „განათლების ხარისხის განვითარების შესახებ“ საქართველოს კანონის 22-ე მუხლის მე-3 პუნქტისა და აკრედიტაციის დებულების 27⁶ მუხლის დებულების მე-4 პუნქტის მიხედვით, პირობითი აკრედიტაციის ვადაა არაუმეტეს 2 წელი.

2. აღწერილობითი ნაწილი და დასაბუთება

2.1. 2020 წლის 11 აგვისტოს შპს უმაღლესმა სასწავლებელმა მილენიუმმა სსიპ - განათლების ხარისხის განვითარების ეროვნულ ცენტრში (შემდგომში - ცენტრი) წარმოადგინა №01/321 (ცენტრში რეგისტრაციის №678801) სააკრედიტაციო განაცხადი „ბიზნესის ადმინისტრირების“ რუსულენოვან საბაკალავრო საგანმანათლებლო პროგრამაზე.

2.2. ცენტრის დირექტორის 2020 წლის 04 სექტემბერს №776159 ბრძანების საფუძველზე, შპს უმაღლესი სასწავლებელი მილენიუმი ცნობილ იქნა აკრედიტაციის მამიებლად. ცენტრის დირექტორის 2020 წლის 28 სექტემბრის №898257 ბრძანებით შეიქმნა ექსპერტთა ჯგუფი, რომელმაც 2020 წლის 07 ოქტომბერს განახორციელა სააკრედიტაციო ვიზიტი საგანმანათლებლო დაწესებულებაში, ხოლო 2020 წლის 02 ნოემბერს წარმოადგინა აკრედიტაციის ექსპერტთა დასკვნა, რომლის შესაბამისად, სააკრედიტაციოდ წარმოდგენილი პროგრამა შეფასდა შემდეგნაირად:

სტანდარტები	შესაბამისობაშია მოთხოვნებთან	მეტწილად შესაბამისობაშია მოთხოვნებთან	ნაწილობრივ შესაბამისობაშია მოთხოვნებთან	არ არის შესაბამისობაში მოთხოვნებთან
1. საგანმანათლებლო პროგრამის მიზანი, სწავლის შედეგები და მათთან პროგრამის შესაბამისობა		✓		
2. სწავლების მეთოდოლოგია და ორგანიზება, პროგრამის ათვისების შეფასების ადეკვატურობა			✓	
3. სტუდენტთა მიღწევები, მათთან ინდივიდუალური მუშაობა	✓			
4. სწავლების რესურსებით უზრუნველყოფა	✓			
5. სწავლების ხარისხის				

განვითარების შესაძლებლობები	✓			
--------------------------------	---	--	--	--

2.3. საბჭომ შეისწავლა საგანმანათლებლო პროგრამების აკრედიტაციასთან დაკავშირებული დოკუმენტაცია, კერძოდ, თვითშეფასების ანგარიშში ასახული ინფორმაცია, ექსპერტთა ჯგუფის დასკვნა, ექსპერტთა ჯგუფის დასკვნის პროექტზე აკრედიტაციის მაძიებლის მიერ ცენტრისთვის წარმოდგენილი არგუმენტირებული პოზიცია.

2.4. ზეპირი მოსმენა გაიმართა 2020 წლის 13 ნოემბერს. სააკრედიტაციო განაცხადის, აკრედიტაციის ექსპერტთა ჯგუფის დასკვნისა და ექსპერტთა ჯგუფის დასკვნის პროექტზე აკრედიტაციის მაძიებლის მიერ ცენტრისთვის წარმოდგენილი არგუმენტირებული პოზიციის, ასევე სხდომაზე დაინტერესებული მხარის ზეპირი პოზიციის მოსმენის საფუძველზე, საბჭომ ნაწილობრივ გაიზიარა ექსპერტთა დასკვნაში ასახული შეფასება, კერძოდ, პირველი სტანდარტი დაწია და ნაცვლად „მეტწილად შესაბამისობაშია მოთხოვნებთან“ განსაზღვრა როგორც „ნაწილობრივად შესაბამისობაშია მოთხოვნებთან“, ასევე დაწია მე-5 სტანდარტი და ნაცვლად „შესაბამისობაშია მოთხოვნებთან“ განსაზღვრა როგორც „მეტწილად შესაბამისია მოთხოვნებთან“.

3. სარეზოლუციო ნაწილი

„უმაღლესი განათლების შესახებ“ საქართველოს კანონის 66-ე მუხლის პირველი პუნქტის, მე-2 პუნქტის „ბ“ ქვეპუნქტის, მე-3 პუნქტის, 3² პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტის, მე-2 პუნქტის „ბ“ ქვეპუნქტის, მე-3, მე-3² ქვეპუნქტების, აკრედიტაციის დებულების 27² მუხლის პირველი პუნქტის, 27⁵-ე მუხლის პირველი პუნქტის „ბ“ ქვეპუნქტის და მე-5 პუნქტის, 27⁶ მუხლის პირველი პუნქტის „გ“ ქვეპუნქტის, მე-4 პუნქტის, „საჯარო სამართლის იურიდიული პირის - განათლების ხარისხის განვითარების ეროვნული ცენტრის საქმისწარმოების წესისა და შინაგანაწესის დამტკიცების შესახებ“ სსიპ - განათლების ხარისხის განვითარების ეროვნული ცენტრის დირექტორის 2011 წლის 01 ივნისის N223 ბრძანების მე-8 მუხლისა და საქართველოს ზოგადი ადმინისტრაციული კოდექსის 53-ე მუხლის შესაბამისად, აკრედიტაციის საბჭომ, კენჭისყრის შედეგად, 14 ხმით ერთის წინააღმდეგ,

გადაწყვეტა:

1. შპს უმაღლეს სასწავლებელ მილენიუმის დანართი №1-ით გათვალისწინებულ ბიზნესის ადმინისტრირების რუსულენოვან საბაკალავრო საგანმანათლებლო პროგრამას 1 წლისა და 6 თვის ვადით მიენიჭოს პირობითი აკრედიტაცია.
2. ცნობილ იქნას აკრედიტაციის ექსპერტთა ჯგუფის დასკვნა ამ გადაწყვეტილების განუყოფელ ნაწილად (დანართი №2).
3. ცნობილ იქნას აკრედიტაციის საბჭოს 2020 წლის 30 ნოემბრის №1138159 სხდომის ოქმის №01 ნაწილი, ამ გადაწყვეტილების განუყოფელ ნაწილად (დანართი №3).
4. მიეცეს შემდეგი რეკომენდაციები:

1. რეკომენდირებულია საგანმანათლებლო პროგრამის მიზნების დახვეწა. კერძოდ, მნიშვნელოვანია მიზნები მოიცავდეს ინფორმაციას იმის შესახებ, თუ რა ცოდნის, უნარებისა და კომპეტენციების მქონე კურსდამთავრებულს მოამზადებს პროგრამა.
2. მნიშვნელოვანია, რომ სწავლის შედეგის („აცნობიერებს ბიზნესის კომპლექსური სფეროების როლს ეკონომიკის მდგრადი განვითარებისათვის“) მისაღწევად პროგრამაში უნდა დაემატოს ეკონომიკის მდგრადი განვითარების და/ან მდგრადი

ბიზნესგანვითარების კურსები, ან საკითხები თავად არსებულ კურსებში. სხვა შემთხვევაში აღნიშნული შედეგი პროგრამაში წარმოდგენილი კურსებით ვერ მიიღწევა. ასევე, ამ შედეგის გაზომვისათვის აუცილებელია, შესაბამის საკითხზე პროექტის მომზადება ანდა განხორციელება, შესაძლებელია გამოყენებული იქნას რთული კომპლექსური დავალება (სოლო ტაქსონომიის მიხედვით) და ამასთანავე სასწავლო პროგრამაში უნდა იყოს UN მდგრადი განვითარების მიზნების შესახებ <https://sdgsgeorgiablog.wordpress.com/>.


3. რეკომენდირებულია საგანმანათლებლო პროგრამის დაშვების წინაპირობად განისაზღვროს რუსული ენა და ეს ადეკვატურად აისახოს შესაბამის დოკუმენტაციაში.
4. საბაკალავრო ნაშრომის წინაპირობა დასაკონკრეტებელია, ამიტომ რეკომენდირებულია საბაკალავრო ნაშრომის წინაპირობად განისაზღვროს სპეციალობის სავალდებულო სასწავლო კომპონენტები გარდა პროფესიული პრაქტიკისა. (პროფესიული პრაქტიკის მიზნებს თუ შევხედავთ არ შეესაბამება საბაკალავრო ნაშრომის წინაპირობის აუცილებლობას);
5. სასწავლო კურსები ბიზნესის საფუძვლები და მეწარმეობა ძალიან გავს შინაარსობრივად ერთმანეთს. ამასთანავე, მეწარმეობა ნაკლებად შეესაბამება საუკეთესო სამეწარმეო ევროპული პრაქტიკის სასწავლო კურსს. შესაბამისად, რეკომენდირებულია მეწარმეობის სასწავლო კურსის ჩანაცვლება;
6. სასწავლო კურსები: „ბიზნესის საფუძვლები“, „მეწარმეობა“, „ფინანსების საფუძვლები“, „საგადასახადო საქმე“, „საჯარო ფინანსები“ და „ბიზნესის სამართალი“ არსებითად გადასახედიან, რადგან მათში გამოყენებულ სასწავლო მასალებში ძირითადად რუსეთის ფედერაციის სამართლებრივი მოწყობის საკითხებია ასახული, აუცილებელია ამ კურსებში ინტეგრირებული იყოს ქართული და მსოფლიო მიდგომები;
7. რეკომენდირებულია, „კორპორაციული ფინანსების საფუძვლების“ წინაპირობად განისაზღვროს ფინანსური აღრიცხვა, ფინანსების საფუძვლების ნაცვლად, რადგან ამ კურსის შესწავლისას სტუდენტი კარგად უნდა კითხულობდეს ფინანსურ ანგარიშგებას, ხოლო ფინანსური აღრიცხვის წინაპირობად ბუღალტრული აღრიცხვის;
8. რეკომენდირებულია პროექტების მართვის წინაპირობად განისაზღვროს მენეჯმენტის საფუძვლები, ოპერაციული მენეჯმენტის ნაცვლად.
9. საჭიროა პროგრამის ხელმძღვანელმა და კურსების ავტორებმა კარგად შეისწავლონ რუსულენოვან ბაზარზე არსებული მსოფლიო სასწავლო ლიტერატურის თარგმანები და მოახდინონ მათი გამოყენება სასწავლო კურსებში;
10. სწავლა-სწავლების მეთოდების კურსების შინაარსთან შესაბამისობის უკეთ გამოსაკვეთათ, საჭიროა სილაბუსებში გამოყოფილი იქნას ცალ-ცალკე სწავლასწავლების მეთოდები და აქტივობები, რადგან სტანდარტის მოთხოვნაა კურსების შინაარსზე სწავლა-სწავლების მეთოდების მორგება;
11. უსდ-ს ხარისხის მართვის სამსახურმა უზრუნველყოს სტუდენტებისგან წარმომადგენლობითი უკუკავშირის მიღება. „ბიზნეს სამართალზე“ გადაიხედოს ლიტერატურა, გამრავალფეროვნდეს წყაროებით და კონცენტრაცია მოხდეს საერთაშორისო, საქართველოსა და შედარებით კონტექსტში;
12. ლიტერატურა გამრავალფეროვნდეს თანამედროვე ლიტერატურით, მათ შორის რუსულ ენაზე თარგმნილი თანამედროვე ავტორებითა და ადეკვატური სახელმძღვანელოებით;
13. ქართული ენის მოდული სავალდებულო იყოს იმ სტუდენტებისათვის, რომლებისთვისაც მშობლიური ენა არ არის ქართული ან არ ფლობენ ქართულ ენას სათანადოდ.

5. საბჭოს აღნიშნული გადაწყვეტილება ძალაში შევიდეს 2020 წლის 30 ნოემბერს.

6. საბჭოს მიერ მიღებული გადაწყვეტილება, საქართველოს ზოგადი ადმინისტრაციული კოდექსის 180-ე მუხლის პირველი ნაწილისა და „განათლების ხარისხის განვითარების შესახებ“ საქართველოს კანონის 24¹ მუხლის პირველი პუნქტის შესაბამისად, საგანმანათლებლო

დაწესებულების მიერ შეიძლება გასაჩივრდეს სააპელაციო საჩივრის სააპელაციო საბჭოში წარდგენის გზით შემდეგ მისამართზე: ქ. თბილისი, მ. ალექსიძის ქ. №2, ან თბილისის საქალაქო სასამართლოს ადმინისტრაციულ საქმეთა კოლეგიაში სარჩელის შეტანის გზით შემდეგ მისამართზე: ქ. თბილისი, დავით აღმაშენებლის ხეივანი, მე-12 კილომეტრი, №6, აღნიშნული გადაწყვეტილებისა და მისი დასაბუთებითი ნაწილების (დანართი №1, დანართი №2, დანართი №3) ცენტრის ვებ-გვერდზე (www.eqe.ge) გამოქვეყნების დღიდან, ერთი თვის ვადაში.

საგანმანათლებლო პროგრამების აკრედიტაციის საბჭო
სხდომის თავმჯდომარე
გეგენავა დიმიტრი



საგანმანათლებლო პროგრამების
აკრედიტაციის საბჭო
საბჭოს მდივანი
თიკანაშვილი ნიკა

